

■ PUNCT DA VISTA

Per esser sincer

Cun dismetter igl rumantsch grischun an scola perdan betg igl surmiran ed er betg igl rumantsch grischun, mabagn igl rumantsch sez. La realitad è tgi tar ena gronda part digls adversaris digl rumantsch grischun e digls iniziants principals vign discurren a tgesa tudestg, vot deir tgi la fegnameira da chels è pac oter tgi angal ple tudestg an scola e betg rumantsch. Ossa on igls iniziants pir dretg da s'angascher pigl surmiran, tgirar pi bagn chel, surpiglier pensums ed incaricas e betg angal discorrer da mantigneir la cultura, igl «noss scazi, igl surmiran».

Real è tgi igl «noss scazi» è igl rumantsch e fatg è tgi cun sbandager igl rumantsch grischun or da scola è betg chel lungatg da scritgira pers ed er betg igl surmiran, mabagn igl rumantsch sez. Siva tgi an Surses è nia decidia da renunztgier agl rumantsch grischun an scola succeda chegl sieir er tigl cumegn Albul/Alvra e Lantsch, chegl tgi fò er senn. Angal cò ballucca igl rumantsch anc bier pi fitg tgi an Surses, on er cò igls iniziants dall'iniziativa angal ena fegnameira: Tudestg an pe da rumantsch.

Schi iniziants an Surses ed an Val Alvra, adversaris ed adherents digl rumantsch grischun von betg la veia comunabla, alloura ins pò pir dretg deir an 15 onns schi betg gio avant: Adia surmiran, bavegna agl tudestg scu lungatg d'alfabetisaziun!

Decidia ò la giuventetna


Surses: Radunanza communal

DA GION NUTEGN STGIER/FMR

■ A parteir digl onn da scola 2021/22 vign puspe introduia an Surses igl surmiran scu lungatg d'alfabetisaziun. Chegl ò decidia igl suveran cun 60% ed uscheia da sa separar digl rumantsch grischun scu lungatg da scola. Igl cumegn Surses ò 1770 persungas cugl dretg da votar. Stadas alla radunanza communal da venderde seira èn 358 persungas (21%), tantas scu anc mai siva dalla fusiun igl 2016 digls nov cumegns tigl cumegn Surses. Crudo an igl è er tgi an sala ins ò vasia fitg blera giuventetna, ella tg'ò alla fegn finala er decidia la votaziun. Attratg chel grond domber ò ena unica tractanda. L'iniziativa per reintrodur igl surmiran an scola e da renunztgier aint igl futur agl rumantsch grischun scu lungatg d'alfabetisaziun. Anc anfignen igl 2031 resta igl rumantsch grischun tar la scola primara, pertge las classes tg'on antschet cun chel lungatg cuntinueschan er cun el anfignen alla fegn dalla scola primara.

Emoziuns an pe da fatgs

An sies pled da bavegna ò igl mastral Leo Thomann detg tg'el deplorascha fitg tgi las davosas emdas vegian las emoziuns an vista all'iniziativa surpiglia igl suramang e betg igls fatgs. Igls iniziants dall'iniziativa vegian er adegna ranfatschea alla suprastanza da betg esser cooperativa an chella tgossa. Chegl seia pero betg sto igl cass, ò punctuo igl president communal. Da menziunar è tuttegn tgi davart diglsiniziants ins ò pitost fatg tema alla populaziun, tgi sainza igl surmiran an scola svanescha chel



Leo Thomann, igl president communal da Surses, è betg nia da persvader las votantas ed igls votants cun igls sies argumaints da vuschar a favur digl rumantsch grischun.

FOTO RTR, FEDERICO BELOTTI

idiom. An chella direcziun è er igl pled da Simon Bergamin, igl pledader digl comite dall'iniziativa, sto. Adegna puspe ò el fatg attent tgi cugl rumantsch grischun an scola geia igl surmiran a perder, pertge en lungatg artificial e tgi vigna betg discurren (rumantsch grischun è pero en lungatg da scritgira e tgi vign betg discurren, chegl tgi igls iniziants on anc adegna betg tgapia) seia nign funda-

maint per la veta professionala. Sies argumaints sainza fatgs concrets on persvas igls preschaints, ò alla fegn igl suveran decidia cun 213:141 vuschs e seis abstenziuns d'introdur puspe igl surmiran scu lungatg d'alfabetisaziun. Thomann ò detg tg'ins accpetta chella decisiun democratica, er schi la suprastanza, igl cunsegl da scola e la magistraglia vessan tignia gugent anavant igl

rumantsch grischun scu lungatg da scola scu gio igls davos 13 onns er. Approvo è er nia igl rendachint 2019. Tar antradas da 34 milliuns francs sera chel cun en gudogn dad 1,3 milliuns francs.

Sustigneida è er neida la dumonda da metter dus milliuns francs an reserva per la nova scola. Accepto on igls preschaints er igl chint d'investiziun an ena somma da 10,6 milliuns francs.

Las aclas vignan drenadas per la terza geda

Brinzauls: Sanaziun dalla bova

DA PEDER ANTONA BALTERMIA/PDS

■ Ainfra las maseiras da sanaziun dalla bova a Brinzauls ins vot er drenar igl territori dallas aclas. E chegl per la terza geda siva digl 1906 ed igl 1976. Cun rimnar las avas ainten canals averts an lunghezza da 1100 m e manar giu la val ins less impideir tgi l'ava sa sfondra aint igl territori dalla bova. Igls costs persiva èn 2,3 miu. Igl muvimaint dalla bova a Brinzauls n'è betg ancunashaint pir igls davos onns, mabagn gio igls tschantaners passos. Mademamaintg era ancunashaint tgi l'ava savess aveir en influenza sen l'intensitad digl muvimaint. Uscheia ins ò gio igls onns 1906/07 piglia a mang da drenar igl territori dallas aclas. E chegl cun ena lunghezza totala da 2200 m. Ena lengia sarada da 700 m ed en canal avert da 1450 m. L'ava è neida manada giu la Val Runtgeller. Igl onn 1976 ins ò gia l'impresiu tgi geia a perder e sfondra mengia bier'ava. Ins ò amplifitgia las lengias existents e ramplazzo igls canals averts antras lengias ainten tera.

Puspe en canal avert

Ainfra las maseiras da sanaziun dalla bova ins vot er realisar en nov ed uscheia igl terz project per drenar igl antier funsal anturn las aclas. Er chest'eda cun la fegnameira da rimnar tant'ava scu pussebel e da la manar or digl territori an muvimaint. E las novas lengias da deflussiu duessan neir installadas sen taragn ferm tgi è stabil.

Igl project vign mano antras igl uffezi per gòt e prievels dalla nateira ed è nia preschento alla radunanza communal antras igl inschignier forestal Bruno Rous-

sette tgi è responsabel persiva tigl Uffezi forestal Grischun central/Moesa.

Tenor las sias explicaziuns duess igl project cumpigliar: Las avas tgi vignan or digl taratsch, da funtangas e da begls duessan neir tschaffadas. Ava sur igl taratsch dalla livada dalla neiv e da fermas plievigias duess er neir rimnada e manada davent. Ainten paleis e lis bletschs duess neir dreno per rimnar l'ava. Tot l'ava rimnada duess, scu gio igl 1906, neir manada davent ainten canals averts. Chegl sen ena lunghezza da 5500 m. Chels canals nissan construias cun mez beischens an antschal ondulo. Chegl èn elemaints dad egn m lunghezza e cotras ins è relativa-

maintg movibel cun manar igl canal. Per drenar las avas dallas paleis dattigl anc ca. 200 m lengias saradas. Per part son er las lengias ed igls canals gio existents neir duvros u reparos cun relativamaintg pacas investiziuns. «Nous savagn betg deir oz exact scu tgi igl antier sistem vign a saveir neir realiso. Cura tgi giagn vedlonder ins vei tge tgi gl'è veiramaintg da far. I sa tracta atgnamaintg dad ena planisaziun cuntinuada», ò detg anavant Roussette.

Tar l'antiera construcziun totgan er ca. 20 tumbigns da controlla e 26 passagis da veias. Taragn agricol ins vot traversar agl our e betg tagler da mez giu.

Sainza garanzeia

La fegnameira cun drenar igl territori dallas aclas è cler: Piglier tant'ava scu pussebel or dalla bova e la manar davent. Uscheia tgi chella na so betg sfundrar. Ed ancunashaintamaintg è l'ava igl muteiv principal tgi l'antiera costa sa mova. Schi geida alloura veiramaintg da frenar igl muvimaint a val dalla costa cun drenar tar las aclas, glez ins spera. Pero garanzeia persiva ins ò nigra. Ins è er pertschert tgi l'ava rimnada antras chest nov sistem da drenar è angal ena part dall'ava tgi sfondra. Forsa angal ena pitschna part e la gronda part sfondra

cun la plievgia e la premeveira cura tgi la neiv liva. Chegl ins so tot betg cun franchezza. Forsa son las perscrutaziuns geologicas e morfologicas dar duple infurmazions.

Las lavours èn gio surdadas ed ins è gio vedlonder dad exequir ellas.

Igls costs pigl antier project da drenar montan a 2,3 miu. La confederaziun ed igl cantun surpeglian 90%. Igl Uffezi cantunal da construcziun bassa sa participescha er e chegl cun 3% e mademamaintg la Veidafier retica cun 2%. Damais dattigl costs restants pigl cumegn d'Albul/Alvra tgi sa somman sen 115 000 francs.

Tar las aclas dattigl er divers adievers privats u er begls da cumegn per las pastgiras. Anfignen ossa eran chellas avas betg separadas digl sistem da drenar. Da nov ins less far ena clera separada. Vot deir tgi ava da deflussiu vign manada separada da chella da beber u tg'ins dovrà per bavradoirs. Chegl monta er tgi detta ena clera separaziun aint igl mantignamaint tranter privats e cumegn.

Alla radunanza communal è er neida fatga la dumonda schi ins vegia panso vedlonder da far cun l'ava rimnada er tigl canals bogneras pi grondas per saveir duvrar l'ava an cass dad arsas da gòt. Tenor Roussette seian tals recepents betg previas, ma ins possa piglier se chegl scu idea.

Or digl mez digl cumegn ins ò er lia saveir tge interpresa tgi seia neida incumbensada cun las lavours. Igl mastral ò communigia tgi chegl seia la firma Pirovino da Le Prese. Ins vegia pero nignas lètgas cun la surdada essend tgi las lavours stettan sot la lescha da submissiu e tenor chella ins vegia da surlascher las lavours all'offerta la pi bungmartgeda.



Sen las aclas da Propissi èn las maschinis gio ved la lavour. Per part èn neidas taradas plantas per lung dallas lengias viglias.

PDS